

Persoal dos sectores de discapacidade, menores e infantil 0-3 exige dignidade laboral e salarial

Durante a concentración na delegación de Política Social na Coruña anunciouse a convocatoria de folga para o 3 de xuño.



Delegadas e delegados concentráronse nas dependencias de Política Social da Coruña (Edificio Amizar) para reclamar condicións laborais e salariais dignas para o persoal de atención á discapacidade, centros de protección de menores e reforma, e educación infantil na etapa 0-3, que realizan o seu traballo en centros privados ou coa xestión privatizada.

A mobilización enmárcase nas protestas que estes tres sectores están realizando de forma conxunta dende hai máis dun ano para exixirlle á Consellaría, que ten as competencias nestas materias, que atende as súas xustas reivindicacións pola mellora das condicións laborais, a baixada das ratios, a redución da carga de traballo e uns salarios dignos a través da creación dun complemento autonómico galego.

O representante da CIG-Ensino, Henrique García, lamentou a inacción de Política Social e da conselleira Fabiola García, á que instou a abrir negociacións e «deixar de ser unha fábrica de conflitos». Neste senso, lembrou que o conxunto dos sectores relacionados coa atención directa e os coidados ás persoas (como discapacidade, menores, infantil 0-3, residencias de maiores, centros de días ou axuda no fogar), están todos en pé de loita a causa da precariedade laboral insostíbel, a falta de efectivos e as problemáticas para poder ofrecer uns servizos de calidade.

Henrique García estendeu esta chamada ao máxime responsábel das políticas da Xunta de Galiza, o presidente Alfonso Rueda, a quen cualificou de «gran incendiario e responsábel da precariedade e dos recortes», ao ter nas rúas tamén a toda a comunidade do ensino público, da sanidade



pública, da administración e incluso tamén ao ensino concertado.

«Con estas condicións non se poden prestar uns servizos de calidade», aseverou o responsábel sindical. E cualificou de vergoñento que un cargo público como a conselleira de Política Social se negue a escoitar e recibir o persoal e a abrir unha mesa tripartita coas patronais «para poder comezar a negociar, tendo en conta ademais que se trata de sectores financiados pola administración».

COMPLEMENTOS AUTONÓMICOS, BAIXA DAS RATIOS E MÁIS PERSOAL

O persoal destes tres sectores (que en Galiza ocupa a unhas 10.000 persoas) está regulado por convenios colectivos de ámbito estatal cuxas táboas salariais están no limiar do SMI e «que poucos máis dereitos

teñen recollidos que o Estatuto das persoas traballadoras». Por iso, aínda que cada sector ten as súas demandas propias, a prioridade común é mellorar as condicións laborais, sociais e salariais mediante a negociación colectiva, abrindo o Marco Galego de Relacións Laborais nestes sectores

Ligazón ao vídeo da concentración:



a través do Consello Galego de Relacións Laborais, no camiño de acadar acordos e convenios dignos e xustos na Galiza.

No inmediato, as centrais sindicais apostan pola negociación de melloras complementarias que permitan incrementar os salarios con complementos autonómicos (na liña do acadado en menores), reducir as ratios, mellorar as condicións de traballo, así como implementar os recursos materiais e as instalacións.

Alén dos baixos salarios, García apuntou tamén á precariedade na contratación, cunhas elevadas taxas de contratos a tempo parcial e temporal «que non permiten chegar a fin de mes», e unhas xornadas abusivas, a quendas, con rotacións, nocturnidade e traballo en festivos e fin de semana «que non se abonan adecuadamente. Falamos incluso de casos no que se paga un euro á hora pola nocturnidade».

«... a prioridade común é mellorar as condicións laborais, sociais e salariais mediante a negociación colectiva, abrindo o Marco Galego de Relacións Laborais nestes sectores a través do Consello Galego de Relacións Laborais»



Demandas en cada un dos sectores

ATENCIÓN Á DISCAPACIDADE (INCLUÍDO O SERVIZO DE ATENCIÓN TEMPERÁ NA GALIZA)

- Aplicación inmediata do total dos incrementos salariais recollidos no XVI Convenio estatal por parte da administración, que agora mesmo están a asumir as asociacións.
- Constitución dunha Mesa tripartita (administración, sindicatos e patronais) coa finalidade de dignificar os salarios coa creación dun complemento salarial autonómico.
- Maior dotación de recursos humanos e materiais, así como baixada das ratios, que garanta unha maior seguridade e mellor coidado tanto do persoal traballador coma das persoas usuarias.

CENTROS DE PROTECCIÓN DE MENORES E REFORMA

- Que se cumpra coa totalidade do pago por parte da administración ás asociacións e a estas a aplicación inmediata a todo o persoal traballador desde a publicación no BOE do «acordo retributivo equiparador autonómico galego», recentemente asinado pola parte social e patronal do sector de menores, para así cobrar as táboas salariais aprobadas no V Convenio Estatal, sen agardar a que se adxudiquen novos concursos, contratos ou concertos, ou até setembro de 2029 como di o convenio.
- O recoñecemento dun complemento autonómico, previa constitución dunha Mesa tripartita galega,





que mellore e dignifique salarios actuais do V convenio e camiñe cara á homologación salarial nas mesmas categorías entre o persoal que está nos distintos tipos de centros, sen ter que esperar a setembro de 2029 para dita homologación.

- A negociación dunha baixada de ratios axustada á realidade e necesidades dos centros, dotándoos de máis persoal que mellore a calidade na atención ás persoas menores.
- A dotación urxente de máis recursos humanos e materiais, así como a mellora das instalacións en todos os centros, garantindo a seguridade e o coidado tanto para o persoal traballador como para os e as menores.

EDUCACIÓN INFANTIL ETAPA 0-3

- Solicitude á Xunta de Galiza da integración das escolas infantís na Consellería de Educación, recoñecendo o seu carácter educativo fronte ao asistencial.

- Unificación das táboas salariais do XIII Convenio estatal, en base á gratuidade da Xunta para todo o sector, confluindo todas as táboas nas tipo A) de xestión indirecta.
- Creación dunha Mesa tripartita galega para traballar no recoñecemento dun complemento autonómico, que dignifique salarios, así como negociar a baixada das ratios e a mellora da calidade educativa.
- A dotación urxente de máis recursos humanos (parella educativa) e recursos materiais.

«Esiximos a creación dunha Mesa tripartita galega para traballar no recoñecemento dun complemento autonómico, que dignifique salarios, así como negociar a baixada das ratios e a mellora da calidade educativa»

OS NOSOS LOCAIS

SANTIAGO (Local Nacional)
Rúa Miguel Ferro Caaveiro 10
15706 Santiago de Compostela
☎ 981 57 68 00 / Fax 981 575 839
santiago@cig-ensino.gal

A CORUÑA
Rúa Alfonso Molina s/n
15007 a Coruña
☎ 981 169 810 / Fax 981 291 735
acorunha@cig-ensino.gal

BAIXO MIÑO
Praza da Guía 3, Baixo
36780 a Guarda
☎ 986 610 465 / Fax 986 610 465
baixomiño@cig-ensino.gal

MORRAZO
Rúa Atranco 19a, Entrechán 1
36947 Cangas
☎ 986 302 987 / Fax 986 302 987
morrazo@cig-ensino.gal

FERROL
Rúa Eduardo Pondal 41-43
15403 Ferrol
☎ 981 358 750 / Fax 981 358 760
ferrol@cig-ensino.gal

LUGO
Ronda da Muralla 58, 2º andar
27003 Lugo
☎ 982 245 023 / Fax 982 2453 891
lugo@cig-ensino.gal

OURENSE
Parque de San Lázaro 12, 4º
32003 Ourense
☎ 988 238 350 / Fax 988 222 855
ourense@cig-ensino.gal

PONTEVEDRA
Rúa Pasanteria 1, 2º Esquerda
36002 Pontevedra
☎ 986 861 513 / Fax 986 855 050
pontevedra@cig-ensino.gal

A MARIÑA
Avenida de Galicia 20, 1º
27700 Ribadeo
☎ 982 129 593 / Fax 982 129 593
amarinha@cig-ensino.gal

VAL DE MONTERREI
Rúa Pedro González 5, 1º
32600 Verín
☎ 988 412 345 / Fax 986 411 013
verin@cig-ensino.gal

VIGO
Rúa Gregorio Espino 47, Baixo
36205 Vigo
☎ 986 827 935 / Fax 986 262 844
vigo@cig-ensino.gal

SALNÉS
Rúa Alexandre Bóveda 2, 2º
36600 Vilagarcía
☎ 986 505 323 / Fax 986 505 323
salnes@cig-ensino.gal